

章氏遺書

第三六冊

章氏遺書外編卷第十六

和州志一

志隅自敘

志者史之一隅州志又志之一隅也獲麟而後遷固極著作之能向歆盡條別之理史家所謂規矩方圓之至也魏晉六朝時得時失至唐而史學絕矣其後如劉知幾曾鞏鄭樵皆良史才生史學廢絕之後能推古人大體非六朝唐宋諸儒所能測識餘子則有似於史而非史有似於學而非學爾然鄭樵有史識而未有史學會鞏具史學而不具史法劉知幾得史法而不得史意此予文史通義所爲作也通義示人而人猶疑信參之蓋空言不及徵諸實事也志隅二十篇略示推行之一端

能反其隅通義非迂言可也嗚呼遷固向歆不可作矣
誠得如劉知幾曾鞏鄭樵其人而與之由識以進之學
由學而通乎法庶幾神明於古人之意焉則春秋經世
之學可以昌明第求之天下解者不過一二人而亦不
暇究其業焉笑且排者又無論已則予之所爲撫卷而
歛歔者也乾隆三十九年季夏之月

紀第一

皇言

周官外史掌四方之志又以書使於四方則書其令鄭
氏注四方之志若魯之春秋晉之乘楚之檮杌是也書
其令謂書王命以授使者是也鄉大夫於正月之吉受

教法於司徒退而頒之鄉吏孔氏疏謂若大司徒職十二教以下是也夫畿內六鄉天子自治則受法於司徒而畿外侯封各治其國以其國制自爲春秋列國之史總名春秋然而四方之書必隸外史書令所出奉爲典章則古者國別爲書而簡策所昭首重王命信可徵也是以春秋歲首必書王正而韓宣子聘魯得見易象春秋以謂周禮在是蓋書在四方則入而正於外史而命行王國亦自外史頒而出之故事有專官而書有定制天下所以協於同文之治也竊意周官之治列國史記必有成法受於王朝如鄉大夫之受教法考察文字罔有奇袤至晉楚之史自以乘與檮杌名書乃周衰官失列國自擅

之制歟司馬遷侯國世家亦存國別爲書之義而孝武
三王之篇詳書詔策冠於篇首王言絲綸史家所重有
由來矣後代方州之書編次失倫體要無當而朝廷詔
誥或入藝文篇首標紀或載沿革又或以州縣偏隅未
有特布德音遂使中朝掌故散見四方之志者闕然無
所考見是固編摩之業世久失傳然亦外史專官秦漢
以來未有識職故也夫封建之世國別爲史然篇首尙
重王正之書列卿或慕周官之典至於郡縣受治守令
承奉詔條一如古者畿內鄉黨州閭之法而外史掌故
未嘗特立專條宋元明州縣志書今可見者迄用一律
亦甚矣其不講於春秋之義也今裒錄州中所有恭編

爲 皇言紀一以時代相次蔚光篇首以誌祗承所自
云爾

表第一

官師

周官御史掌贊書數從政鄭氏注謂凡數及其見在空
闕者蓋贊太宰建六典而掌邦治之故事也夫官有先
後政有得失太宰存其綱紀而御史指數其人以贊之
則百工敘而庶績熙也後代官儀之篇考選之格漢官儀唐
六典梁選簿隋官序錄代有成書而官職姓名浩繁莫紀則是有
太宰之綱紀而無御史之數從政者也班固百官公卿
表猶存古意其篇首敘官則太宰六典之遺也其後表

職官姓氏則御史數從政之遺也范陳而後斯風渺矣
至於唐書宋史乃有宰相年表然亦無暇旁及卿尹諸
官非惟史臣思慮有所未周抑史籍猥繁其勢亦難概
舉也至於嗜古之士掇輯品令聯綴姓名職官故事之
書六朝以還於斯爲盛然而中朝掌故不及方州猥瑣
之編難登史志則記載無法而編次失倫前史不得不
職其咎也夫百職卿尹中朝敘官方州守令外史紀載
周官御史數從政之士則外史所掌四方之志不徒山
川土俗凡所謂分職受事必有其書以歸柱下之掌可
知也唐人文集往往有廳壁題名之記蓋亦敘官之意
也然文存而名不可考自非蒐羅金石詳定碑碣莫得

而知則未嘗勒爲專書之故也宋元以來至於近代方州之書頗記任人名氏然猥瑣無文如閩縣令署役卯簿則亦非班史年經月緯之遺也或編次爲表者序錄不詳品秩無次或限於尺幅其有官階稍多沿革異制卽文武分編或府州別記以趨苟簡是不知班史三十四官分一十四級之遺法也又前人姓氏不可周知然遺編具存他說互見不爲博采旁搜徒託闕文之義是又不可語於稽古之功者也今折衷諸家考次前後上始漢代迄於今茲勒爲一表疑者闕之後之覽者得以詳焉

漢制諸州置監察御史文帝十三年以御史不奉法乃

遣丞相史分刺諸州以督之不常設元封元年御史止不復監五年置部刺史掌詔六條察州江南爲揚徐豫三州之地有三刺史成帝綏和元年以刺史位下大夫而臨二千石輕重不相準乃更爲州牧秩眞二千石哀帝建平二年罷牧復置刺史元壽二年復設州牧光武中興仍置刺史西漢以來刺史周行郡國無定所後漢始建所治之地時揚州刺史治厯陽後徙壽春靈帝中平五年又改置牧其州之官屬有別駕治中兵曹部郡國從事是爲從事史有主簿門亭長功曹書佐書經師月令師律令師簿書佐典郡國書佐是爲假佐皆州自辟除凡一州統數郡郡之附州爲都置一尹一丞其不

附州者爲郡置一守一丞一尉守之佐有功曹史五官掾部縣督郵門亭長主記室史閣下及諸曹各有書佐幹凡一郡統數縣縣萬戶以上者置令萬戶以下者皆置長皆有丞尉凡縣中十里一亭亭有長十亭一鄉鄉有三老有嗇夫有游徼三老主教化嗇夫收賦稅游徼巡盜賊謂之鄉官其郡爲諸侯王國者置內史以掌其治成帝綏和元年省內史以相治民皆下置守每郡國各置文學一人

漢

刺史

光武建武鮑永

章帝建初張禹

晉都督徐揚二州如魏懷帝永嘉初又分揚州置二都督揚州江南諸軍事鎮建業揚州江北諸軍事鎮壽春先是諸州亦領兵太康元年吳平乃詔州郡悉去兵大郡置武吏百人小郡置五十人

表第二

選舉

周官鄉大夫三年大比興一鄉之賢能獻書於王王再拜受之登於天府甚盛典也漢制孝廉茂才力田賢良之舉蓋以古者鄉黨州閭之遺當時賢書典籍辟舉掌故未有專書則以科條未繁興替人文散見紀傳潛心之士自可考而知也江左六朝州郡僑遷士不土著學

不專業鄉舉里選勢漸難行至於隋氏一以文學詞章
創爲進士之舉有唐以來於斯爲盛選舉既專資格愈
重科條繁委故事相傳於是文學之士蒐羅典章采摭
聞見識大識小並有成書傳記故事雜以俳諧而選舉
之書蓋哀然與柱下所藏等矣撰著既繁條貫義例未
能一轍就求其指略有三門若晁迥進士編勅陸深科
場條貫之屬律例功令之書也姚康樂史科第錄姚康
十六
卷樂史
十卷李奕洪适登科記李奕二卷亡
洪适十五卷題名記傳之類
也王定保唐摭言錢明逸宋衣冠盛事稗野雜記之屬
也史臣采輯掌故編於書志裁擇人事次入列傳一代
浩繁義例嚴謹其筆削之餘等於棄土之苴吐果之核

而陳編猥瑣雜錄無文小牘短書不能傳世行遠遂使
甲第人文周官所以拜獻於王而登之天府者闕焉不
備是亦方州之書不遵鄉大夫慎重賢書之制記載無
法條貫未明之咎也近代頗有考定方州自爲一書者
若樂史江南登科記張朝瑞南國賢書陳汝元皇明浙
士登科考皆類萃一方掌故惜未見之天下通行而州
縣志書編次科目表列舉貢前明以來頗存其例較之
宋元州郡之書可謂寸有所長者矣特其體例未純紀
載無法不熟年經事緯之例亦有表用條例者舉貢掾
雜成書甚者附載事蹟表傳不分此則相率成風未可
悉數其謬者也

論辨詳列傳第
一篇總論內

今摭史志之文先詳制

度後列題名以世相次起於唐代訖於今茲爲選舉表其封廕辟舉不可紀以年者附其後云

唐制取士之科大要有三由學館者曰生徒由州縣者曰鄉貢皆升於有司而進退之其科之目有秀才有明經有俊士有進士有明法有明字有明算有一史有三史有開元禮有道舉有童子而明經之別有五經有三經有二經有學究一經有三禮有三傳有史料此歲舉之常選也其天子自詔者曰制舉所以待非常之才焉終唐之世見於羣書可考者一人

唐

進士

代宗貞元十五張籍

年已卯

宋之科目有進士有諸科有武舉常選之外又有制科有童子舉熙寧以來設進士九經五經開元禮三史三禮三傳學究明經明法等科考第之制凡五等一二等曰及第三等曰出身四五等曰同出身學校有三舍法崇寧建辟雍於郊以處貢士而三舍考選法乃遍天下於是州郡貢之辟雍由辟雍升之太學

宋

進士

仁宗天聖二年

朱瑩

五年

彭思永

官至戶部侍郎

八年

沈立

慶歷六年

朱略

皇祐元年

沈文通

五年

張獻民

嘉祐二年

耿憲

表第三

氏族

周官小史奠繫世辨昭穆譜牒之掌古有專官司馬遷

以五帝繫牒尙書集世記爲三代世表氏族淵源有自

來矣班固以還不載譜系而王符氏姓之篇潛夫論第三十五篇

杜預世族之譜春秋釋例第二篇則治經著論別有專長義盡

而止不復更求譜學也自魏晉以降迄乎六朝族望漸

崇學士大夫輒推太史世家遺意自爲家傳其命名之別若王肅家傳虞覽家記范汪世傳明粲世錄陸煦家史陸史十卷之屬並於譜牒之外勒爲專書以俟採錄者也至於摯虞昭穆記王儉百家譜以及何氏姓苑賈氏要狀賈希鑑氏族要狀十五卷諸編則總彙羣倫編分類次上者可裨史乘下或流入類書其別甚廣不可不辨也族屬旣嚴郡望愈重若沛國劉氏隴西李氏太原王氏陳郡謝氏雖子姓散處或本非同居然而推言族望必本所始後魏遷洛則有八氏十姓三十六族九十二姓並居河南洛陽而中國人士各第門閥有四海大姓州姓郡姓縣姓撰爲譜錄齊梁之間斯風益盛郡譜州牒並有專